

MPRM no IFC selebra akordu kona-ba Kaptura no Armazenamentu Karbonu



Ministru Petróleu no Rekursu Minerál, Francisco da Costa Monteiro, asina akordu ho Diretór Nasionál IFC ba Indonézia no Timor-Leste, Euan Marshall, hodi fô assisténsia kona-ba Kaptura no Armazenamentu Karbonu, iha Gabinete MPRM, Farol, kinta (21/03/2024). Foto Tatoli/António Daciparu

DILI, 21 marsu 2024 (TATOLI)—Ministériu Petróleu Rekursu no Minerál (MPRM) no *International Finance Corporation* (IFC), kinta ne'e, selebra akordu ida kona-ba Kaptura no Armazenamentu Karbonu (CCS-Carbon Capture Storage)

Akordu ne'e asina husi Diretór Nasionál IFC ba Indonézia no Timor-Leste, Euan Marshall no Ministru Petróleu Rekursu no Minerál, Francisco da Costa Monteiro.

Biban ne'e, Ministru Francisco, esprika, akordu ne'e la'ós foun maibé hanesan kontinuasaun husi serbisu hamutuk entre IFC ho entidade sira anteriormente.

“Projetu ida iha ligasaun ho petróleu maibé la'ós projetu petróleu, projetu ida tenta atu kaptá nomós armazena CO₂. Entaun ministériu foti iniciativa katak sei haree kona-ba asuntu ne'e, depois maka orienta serbisu ba Autoridade Nasionál Petróleu no Timor GAP. Akordu ne'e di'ak tebetebes tanba permite serbisu balun ne'ebé IFC halo tiha ona no agora ita iha faze finál ida halo nusa mak konklui enkuadramentu balun hodi permite Timor-Leste konsidera hanesan ninia enkuadramentu sira atu aplika iha prosesu CCS ne'e rasik,” Ministru Francisco relata hafoin serimónia asinatura akordu, iha salaun MPRM, Farol.

Tuir parseiru sira, CCS hanesan kestaun foun ida iha Timor inklui iha país balun tanba hola parte iha iniciativa ida atu dekarboniza indústria petrolífera.

“Se ita dudu ida-ne'e ba oin, iha rejiaun ida-ne'e iha mós sustentabilidade iha desenvolvimentu la'ós de'it jerál ne'ebé maka toma konta ba mudansa klimatika nian, maibé mós iha sustentabilidade no possibilidade kontinuasaun desenvolvimentu mina no gás nafatin tanba einvezde prodús mina no gás depois husik hela CO₂ ne'e iha atmosfera ne'ebé ladi'ak ba ita-nia klima, ita iha ona mekanizmu atu jere no kontrola emisaun CO₂, nune'e permite kontinuasaun investimentu iha setór mina no gás iha Timor, rejiaun no mundu,” governante ne'e akresenta.

Projetu CCS ne'e ninia impaktu sosiu ekonómiku boot tebetebes, tanba bele permite kontinuasaun atividade ekonómiku balun.

“Helikóptro ne'ebé durante tula ita-nia ema sira bá no mai iha Bayu-undan bele kontinua nafatin, ró-ahi sira mós kontinua opera no fó postu serbisu ba Timor-oan,” nia deskreve.

Ministru subliña, assisténsia téknika ne'ebé oferese hosi IFC iha área oin-oin, iha faze dahuluk eintermu koñesementu ba indústria rasik, siénsia no teknolojia ne'ebé iha, troka esperiénsia no vizita. Agora tama iha assisténsia ida ajuda Timor formula enkuadramentu legál ho komersiál.

”Bainhira presiza lei ruma karik, lei ne'e ninia kontíudu prinsipál ne'e hanusa tanba indústria ne'e funsiona iha fatin sira-seluk ho nia lejislasaun rasik, tanba ita mós hakarak foti esperiénsia barak ne'ebé IFC ho nia grupu Banku Mundiál iha kona-ba jestaun nomós koñesimentu ba iha área emisaun CO₂ nian ka oinsá atu jere CO₂,” Ministru tenik.

Diretór Nasionál IFC ba Indonézia no Timor-Leste, Euan Marshall, dehan, liuhosi akordu ne'e, IFC sei fornese apoia téknika ba MPRM nomós entidade relevante hodi desenvolve enkuadramentu legál ba projetu armazenamentu karbonu iha tasi Timor liu-liu iha kampu Bayu-undan, nomós facilidade projetu Bayu-undan rasik.

“Ami haree katak, ida-ne'e oportunidade interresante tebes ba Timor tanba bele sai fonte rendimentu ba futuro, bele mós lori inovasaun lubun ba Timor-Leste hodi fó benefísiu ba Ministériu rasik nomós ba nasaun. Ita hotu hatene ita hasoru krize kona-ba mudansa klimátika entaun projetu armazenamentu karbonu iha posu Bayu-undan nomós teknolojia armazenamentu karbonu bele ajuda iha ita-nia luta hodi hasoru dezafiu mudansa klimátika,” Euan Marshall, salienta.

Nia dehan, projetu ne'e bele fó benefísiu ba Timor-Leste no mundu tomak tanba haree katak teknolojia, setór kapturasaun nomós armazenamentu karbonu ne'ebé foin iha faze desenvolvimentu, entaun ita bele sente orgullu no sente katak ida-ne'e hanesan buat ne'ebé interresante tebes katak Timor-Leste bele inteira iha prosesu desenvolvimentu ba teknolojia no merkadu ne'ebé importante tebes.

Antes ne'e, Timor-Leste ho Austrália inisia ona diskusaun ba desenvolvimentu projetu CCS iha kampu Bayu-undan hafoin desmantelamentu ekipamentu produsaun petrolífera. Diskusaun ne'e hahú ona iha âmbito Ministru Francisco da Costa halo vizita traballu bá Cambera, Austrália, iha loron 23 janeiru 2024.

Empreza petrolífera australiana, Santos Limited, ne'ebé antes ne'e ho partisipasaun maioritária iha konsórsiu projetu desenvolvimentu Bayu-undan, representa 43,4% iha operasaun, hamutuk ho empreza sira seluk iha interrese atu desenvolve projetu CCS maibé Governu rai rua sei haree uluk enkuadramentu legál sira molok legaliza empreza sira-ne'ebé atu envolve.

Operasaun produsaun petrolífera Bayu-undan maka Santos limited representa kapitál 43,4% no restante pertense ba SK E&S 25%, INPEX 11,4%, Eni 11%, JERA (6,1%), no Tokyo Gas (3,1%).

CCS hanesan teknolojia atu kaptura no armazena karbonu iha rai-laran, ne'ebé konsidera hanesan esforsu ne'ebé halo atu halo redusaun emisaun CO₂ iha atmosferu no hosi kampu gás balun ne'ebé iha kontíudu CO₂ barak tebes.

Durante ne'e, projetu Bayu-undan kontribui ona reseita no finansia despeza Estadu, ne'ebé akumulula iha fundu petrolíferu.

Jornalista : Antónia Gusmão Editora : Julia Chatarina

Government Signs Cooperation Agreement with IFC for Carbon Capture and Storage Project

The Minister of Petroleum and Mineral Resources, Francisco da Costa Monteiro, and the Director of the International Finance Corporation (IFC) for Indonesia and Timor-Leste, Euan Marshall, signed a cooperation agreement on March 21st at the ministry's premises. The agreement includes technical assistance in the development of legal and regulatory frameworks and other areas for the Carbon Capture and Storage Project (CCS).



Euan Marshall, Director of IFC, emphasised that the CCS project, associated with the closure of the Bayu-Undan gas field, represents an innovative and lucrative opportunity for Timor-Leste by managing wells and facilities on the Bayu-Undan platform. He also said that this project is exciting, given that Timor-Leste is preparing to lead CCS technology and the corresponding market in the region.



Minister Francisco da Costa Monteiro emphasised that this project is an important initiative to decarbonise the oil industry, thus contributing to sustainable climate management, the control of carbon dioxide in the atmosphere and the continuity of oil and gas production.

Regarding the CCS's benefits, the Minister emphasised its significant economic impact, allowing the active maintenance of the Bayu-Undan platform facilities, creating job opportunities and other socio-economic impacts.

This agreement between the Minister of Petroleum and Mineral Resources and the IFC follows the work already carried out with relevant organisations to share knowledge on CCS technology. The current focus is on technical assistance for developing legal and regulatory frameworks and other essential aspects of the CCS project.

David Freedman, IFC representative in Timor-Leste, also attended the signing of the agreement.

url: <https://timor-leste.gov.tl/?lang=en&p=36866>